

Cun Badilatti e Collenberg

Vendergis vargau ha l'uniun Pro Lumerins envidau la populaziun alla sera da sogn Martin. Il romanist Michele Luigi Badilatti ha presentau l'ovra ch'el ha fatg pil doctorat.

AUGUSTIN BEELI/FMR

«Quei text ei ina absoluta perla», ha *Michele Luigi Badilatti* getg duront il discuors ella Casa d'Angel a Lumbrein. Il scribent da quel, Gion Casper Collenberg, ei staus il protagonist dall'occurrenza. Alla sera da sogn Martin ha *Anita Capaul* dall'uniun Pro Lumerins buca saviu beneventar el persunalmein. Collenberg ei naschius ils 1733 a Lumbrein. Morts eis el 1792 en Fronscha, ella vegliadetgna da 59 onns. Quei temps furiava la Revoluziun franzosa. La mort dil Lumerin ha denton negin connex cun quella, auter che quei ch'ins supponeva entochen dacuort.

Rapport autobiografic

Il secund protagonist dalla sera sogn Martin, Michele Luigi Badilatti, ha saviu cumprovar quei. En sia dissertaziun ha el erui che Gion Casper Collenberg ei morts d'ina malsogna e buca d'ina attacca. Gl'uoost 1792 aveva il pievel da Paris attaccau las Tuilleries, il palast roial da Ludovic XVI. Gion Casper Collenberg seigi era morts en quels embrugls, havevan ins scret els registers. Na, il commerciant ei morts ils 30 da december 1792 d'ina malsogna, ella casa da siu quinau a Beaujeu el departament Rhône.

Michele L. Badilatti ei buca historicher, mobein romanist. Alla sera da sogn Martin ha el presentau sia lavur ch'ei cumparida sco cu-

disch cul tetel «Gion Casper Collenberg: Viadi en l'Isla de Fronscha 1765/66». Il Lumerin s'auda tiels emigrants che han relaschau allas proximas generaziuns rapports autentic. La perla ei quel cul tetel «Viadi en l'Isla de Fronscha». Igl ei in rapport da viadi autobiografic d'avon 257 onns. Culla nav «Compte d'Artois» ei Collenberg s'embarcaus ils 27 d'october 1765 cun siu patrùn a Lorient ella Bretagne per accompagnar quel sill'insla Mauritius.

Il pli vegl rapport da viadi original

El liug d'origin dil protagonist ha la moderatura dalla sera, *Anita Capaul*, discuriu cun Michele Badilatti. In ver Lumerin, il romanist *Clau Solèr*, ha legiu passaschas ord il rapport da 1765/66. In'ulteriura Lumerina, *Isabella Collenberg*, feglia da *Maria Angela Collenberg* senta a Rapperswil, ha embelliu la sera musicalmein cun cant e ghitarra.



(da sen.) Isabella Collenberg, Anita Capaul, Michele Luigi Badilatti e Clau Solèr.

FOTO AUGUSTIN BEELI